

"Joint Naga Team" aser Naga Machang bangzüngtepogo

Dimapur, September 27, 2025 (TYO): Naga nunger telongjem aser külem nükjidong atema September 27, 2025 nü Naga Political Groups 15, Naga Tribal Hohos 33 aser Forum for Naga Reconciliation ajanga Zunheboto Resolution agizükogo.

Naga yimtenren mapa ya nisung kar meyong masü saka yimtsüng shia, kidong shia aser putu shia indang senmang lir. Anungji Zunheboto senden nung Naga civil aser tamangba telok ajak külemi longjemer Council of Naga Cooperation and Relationship (CNCR) kübok Naga Machang pusemtsü nüngdak ta Zunheboto Resolution agiogo.

Naga Machang ya Naga nunger ajak longjemtsüba sabang ka lir aser NPGs ajak memenui Machang kübok longjemtsü ayongzüker. Iba ajanga Naga Machang tashi aittsü aser iba asoshi CNCR-i meranga inyaksü ta Zunheboto Resolution nungsa nangzüko.

Covenant of Naga Reconciliation nung sign asüba sülen telungpur telok balala tsüngda ozüng alema inyaksangshiba anenogo aser Naga nunger nem teimla tasen ka bentsür aruogo. Naga Political Groups-i nendaka inyakba aser putepshitsü tejangraba pelaa agizüküker ta Zunheboto senden nungsa bangjemtep.

Putepshitsü atema Naga Political Groups tsüngda, Naga Tribal Hohos tsüngda aser Naga

nunger ajak tsüngda tatok agütsüteptsü ayongzüker. Tatok agütsütepba aser kati ka akhümtsübuba ajanga dang Naga nunger külem tarutsü yangertsü ta parnokisa bangjemtepogo.

Zunheboto senden nungsa Naga nunger tesem ajungalen Arogo aser tamangba teloktemi October 2025 ita pei ajungba mapang apir nung sarasadem sentongtem agitsü mepishia metetdaksüogo.

Asenok putepshitsü aser asentenshitsü atema külemi aodang Tsüngrem dang nungi shisatsü, taneptsü aser tasütait meshia sarasademtsü ayongzüker ta Zunheboto sendenisa metetdaksüogo.

Naga Tribal Hohos, Naga Political Groups, the Public, aser Forum for Naga Reconciliation (FNR)-i Angami Public Organization, Ao Senden aser Sumi Hoho nunger den külemi Jotsoma, Ungma aser Zunheboto nung alirtem nem tenüngsang agütsüba metetdaksüogo.

Sumi Hoho President aser Executive team-i Naga yimtenren tarutsü atema lenmang yapoktsüba atema kanga pelar aser nenok mapa tajung asoshi tetushi agütsür ta Zunheboto senden ajanga metetdaksü.

India sorkari Naga putiotsü khenyongi balaka aser asen maitsü den putepa asen sasa tarutsü yangertsü temeten lir ta agizükba atema pelar aser tenüngsang agütsür ta Zunheboto sendenisa metetdaksüogo.

Nagaland nung World Tourism Day amung

Kohima, September 27, 2025 (TYO): Hokolbarnü Directorate of Tourism, Nagaland nung United Nations World Tourism Day ayonga mungogo.

Iba sentong ya "Tourism and Sustainable Transformation" omen nungajemdaker amung.

"Asenoki sobaliba wazüka ayuba, lipoküm kümzüka aser lisopurtem tashi itdaksüba tourism maparen inyaksüla" ta Commissioner & Secretary, Tourism, Arenla Jamir-i ashi.

Nagaland nung Hornbill Festival nungi Dzükou Valley, lisopur inyaksangshi balala, handloom, handicrafts aser chiyungtsü tapu meina aika lir aser item ajanga asenok global tourism map nung densemogo ta lai ashi.

"Asen Hornbill Festival ajanga asen sobaliba takar alima dang sayuogo. Village homestays, eco-tourism initiatives, aser chiyungtsütem ajanga tourism ajanga yimtsüngtem tashi itdaksüba, senotsü anguba aser asen maitsü wazüka ayutsü tatishitsü tajung agütsür" ta Commissioner & Secretary Arenla-isa ashi.

Ajisüaka, unregulated tourism ajanga lipoküm raksar, sobaliba menener aser rongsenketzüng nung

meputep adoker, ta laisa tekümdangtsü olen ka ashi.

"Sustainable tourism ya tebilemba ka dang masü saka tenangzüka ka lir. Iba ya asen arentem, ayongtem, aser tenemtem wazüka ayutsüba asoshi lir. Sustainable tourism ta asüba nung lisopur sobaliba aser oshitem kümzüka ayutsü, local entrepreneurship ajungkettsü aser tarutsü pututem nem ecosystem tajung ka agütsütsü atema lir" ta Arenla-isa metetdaksü.

Department-i homestays and eco-camps ajanga community-based tourism tenzüko. Tour guides aser hospitality professionals ama lanurtem asoshi skill development agir, eco-tourism projects inyaker aser digital tools amshir. NGOs aser international agencies den tesentaktep yangluba ajanga global sustainability goals den sendakteper ta laisa ashi.

"Tourism ya tesem ka nungi agiba dang masü saka nübertem, alima aser sobaliba nem meyipa agütsüba asütsüla. Tourism shitak inyakra sustainable transformation chichiba bener arur ta Nagaland-i tatishitsü tajung sayutsüla" ta Arenla Jamir-isa ashi.

Khonoma Upgrade Programme

by UN Tourism 2022 chairman Neikedolie Hiekha-ia o jembidang iba sentong ajanga Khonoma nem technical guidance, training opportunities, aser international visibility agütsür ta ashi.

Upgrade Programme ajanga yimtsüng nem teyari agütsür saka Best Tourism Villages naroküm angutsü atema teyari talila nüngdaker ta pai ashi.

Khonoma ya shikaritem aliba yimtsüng ka aliba nungi conservation aser community-i aniba tourism yimtsüng indang model ka kümogo. Onoki shikari noktangba den arem wazüka ayur aser Khonoma Nature Conservation and Tragopan Sanctuary lapoka lir ta Neikedolie Hiekha-isa ashi.

Khonoma nung eco-guided treks, homestays, handicrafts, aser agro-based maparen ajanga senotsü ajangzüker saka sobaliba wazüka ayur, ta paisa ashi.

"Tanü World Tourism Day nung asenoki Khonoma ya Nagaland nung konang aketba yimtsüng ka ama dang masü saka alima asoshi milendong ka ama benjungtepdi. Meimchir aser alima putepa aliba ajanga chichiba terenlok angur ta Khonoma-i asenok dang sayur" ta Hiekha-isa ashi.

Governor Bhalla-i anogo ananü atema Wokha aser Doyang semdang

Dimapur, September 27, 2025 (TYO): Nagaland Governor Ajay Kumar Bhalla-i September 27, 2025 nü anogo ananü atema Wokha district semdangi aruogo.

Tanü Assam Rifles Camp, Wokha nung Governor Bhalla pelaa agizük aser pa nem Guard of Honour ka agütsü.

Doyang-i aodang pai Don Bosco Higher Secondary School, Wokha nung khen anenzüka liasü.

Doyang nung Governor Bhalla-i Doyang Hydroelectric Power Station

semdang aser North Eastern Electric Power Corporation (NEEPCO) ketdangsürtem den senden ka amen.

Iba senden nung Head of Project, John Zeliang menden liasü aser Senior Manager (Civil), Zachamo Ovung-i presentation ka sayu.

Senior Manager (Civil)-i Doyang Hydroelectric Dam amenokba aser tongtipang temetetsütem lemsatop. NEEPCO-i infrastructure development, community outreach, funding mechanisms, aser regional connectivity maparen inyakba osang

paisa metetdaksü.

Governor Bhalla-i NEEPCO telok dang parnoki bendanga agüja inyakba atema tenüngsang agütsü.

Governor Bhalla kinungsü Jyoti Grover Bhalla-i pa meina aru. Maneni Wokha Deputy Commissioner Vineet Kumar IAS, Superintendent of Police Wokha, T. Relo Aye aser tanga tongti ketdangsürtemi Governor meina liasü.

Governor Bhalla-i taonung Doyang nung yipzüksü aser asüng site visits asütsü sentong lir.

Shisaluyimba ya taküm aser alima asoshi khuret benteta tajangzük agütsütetba nisung kaka renemtsüba maparen ka lir: Temjenmenla



Nagaland SCERT, Deputy Director, Wt. Temjenmenla

Mokokchung, 27th Sept: New Education Policy (NEP 2020) ajanga education tsütsü temelenshi jenti bener arutsüdaki. Iba policy ajanga talisa 'skill development' aser 'vocational education' nung kanga tongtibang agütsür. Shisaluyimbaji joko tatidang ajanga kulikaket angutsü atema dangbo masü saka taküm aser alima asoshi khuret benteta tajangzük agütsütetba nisung kaka renemtsüba maparen ka lir.

Iba o ya Nagaland SCERT, Deputy Director, Wt. Temjenmenla-i Khensa Baptist Arogo Women Ministry-i ayongba 4 buba Khensatsür Shisatokden sentong koba Khensa yimdak "Südem Akangshiro" omen dak rangloker "loktiliba aser kaket shisatsü terenlok" onük nung ajemdaker jembidang metetdaksü. "Iba nung ya tetsütem shilem tulu lir, kechiba süra, tanur ka asoshi

shisaluyimbaji kidang nungi tenzüker aser pa/la asoshi mezüng tesayurji tetsü kaji lir", ta lai ashi.

Tila asüadang nungi tanurtem dang teka mapatem sayutsüla aser meranga inyaksü ajungshitsüla. Tanur shia tejangraba/inyaktetba meteta iba nungji molutettsü nüngdaker. Mapa tapu ajakji tongtibang aser akümtsübutsü tim aser kechi mapa südir süang inyaksü nunnganga malitsü parnok dang sayutsüla, ta lai sentepa alirtem ayongzüker.

Lanurtem mapa ngutettsüsa teka mapa inyakba (skill) renlok daksütsü asoshi asen telokia sentong balala ajanga parnok nem training balala agütsütettsü. Yimer rongnung shishilembar aser teka mapa balala inyaktetertem ajungshia parnok mapa tenzüka aotsü

atema teyari lenmang balala ajanga nungittsü koka lir, ta laisa ashi.

Ano NEP 2020-i tetuyuba agütsübatem rongnung, tongtibang kaji; akhi asenoki benshia aruba shisatsü (traditional knowledge system)-tem lepa bener arua tawa tanü yangertetba education den külemi lirumedema sayütsüla, pei tetsü oshi nung lesson-tem sayutsü aser nüburtemi shilem agiba, itemjia kar densema lir, ta lai ashi.

Laisa tetsürtemi shilem agitettsüba kar lemsatepdang, tetsü tebou ken aser otsüolem, aluyimba yimya, liso süngotu (local herb) aser temang anepaluba yimya, sü atakba aser yongsen mapa, item ya asenoki video yanglua mangoka yur library nung mesüra digital balala ajanga lemsatettsü aser aji school aser lanurtem asoshi

kanga tajangzük asütsü. Item metetertem jaoka mesüra temeteteri mulungsoa ibalaji lokti balala nung sayutettsü mesüra shisatokden sentong ayonga angazüktettsü.

Ano shisalemsaba telok mesüra WhatsApp group tenteter temeteteri metsü (seeds) ayuba, atsü/alu ayimba mesüra teka mapatem sayutettsü. School nungsa magiyonga pei tetsü oshijibo tetsütemia tanurtemi kanga junga meteta jembitettsüsa asenoki sayutettsüla aser ajungshitsüla. Kaket rijutem den tesentaktep tajung yur parnok nüngdaktem ajiteta yariba, school tanurtem lokti mapatem nung shilem agidaksüba aser ano aika lir, itemji ajanga lokti ka ama asenoki tanur education nung shilem tajung agitettsü, ta laisa metetdaksü.

(Maneni tapak 2 nung...)

Angh Ajay Kumar Bhalla NBSG Chief Patron kümogo



Dimapur, Rongjui/September 27 (TYO): Nagaland Bharat Scouts and Guides (NBSG) Induction aser tetushi agütsüba sentong September 27 nü Dr. Imkongliba Ao Hall, Raj Bhavan, Kohima nung agiogo, kong Nagaland Angh Ajay Kumar Bhalla, Nagaland Bharat Scouts and Guides Chief Patron asütsü formally shimogo.

Sentong nung o jembiba mapang Angh-i, Rajya Puraskar (Governor's Award) agizükba Scouts 5 aser Guides 11 nem tenüngsang agütsü. Iba tetushi ya state jenjang nung Scouts and Guides atema ajak dang tematiba tetushi lir.

Pai, iba tetushi ya badge ka dang masü saka discipline, lenisüba, service aser Scouting and Guiding indang tamendakdak atema bendanga agütsür aliba temaitsü lir ta ashi. Anghi iba tetushi angurtem nem parnoki bendanga agüja inyakba aser Seva tanüla atema tenüngsang agütsü, aser President's Award for Scouts and Guides angutsü atema merangtsü ajungshi, koba linük nung tetushi tematiba lir.

Maneni angh-i, nisung yimayimpong yangluba, lokti khuret angatetdaksüba aser lanurtem terenlok atema Bharat Scouts and Guides movement-i kechi shilem agir,

iba indang lemsatep.

Chief Patron ka ama NBSG nem teyari agütsütsü nangzüka pai, iba movement ya state kübok district ajaki prokshia yoktsü atema ketdangsürtem, lenirtem aser volunteer tem den teka amteper inyaksü tenangzüka agüja liasü.

Sentong nung Commissioner & Secretary, Youth Resources and Sports (YRS), aser Vice President, NBSG, Anthony Ngullie-i lokti pela agizükba o jembi. Tir o ya NBSG tir S. Keoshu Yimkhiung-i jembi aser MLA & Advisor, YRS tenati Tritiya Sopan Certificates agüja liasü. Sentong nungsa State Commissioner, NBSG, Chubanungla-i tepela o jembia liasü.

Sentong agiba mapang Tritiya Sopan aser Rajya Puruskar certificate tem lemtsü aser Padma Shri Sano Vamuzo nema la mapa tajung asoshi tetushi agüja liasü.

Kingniu nung jenjang menjang benjung mungogo

Dimapur, Rongjui/September 27 (TYO): Kingniu yimtsüng kübok Kingniu Heritage Center nung jenjang menjang benjung kanga takok ngua mungogo. Iba benjung ya "Sowing Tradition, Harvesting the Future" omen nung ajemdaker munga liasü.

Iba benjung ajanga jenjang menjang ya tetsü tebou mapang nung amshia aruba chiyongtsü ka ta sayuba dang masü saka tarutsü nung food security atema tia tensa ajak ajangteta aruba chiyongtsü ka ta sayuogo.

Iba sentong nung tongti tejaokerji MLA Shri Bunei M.

Lamthiu liasü, aser pa ya nokinketer tsüngsa ka agi agizük, aser iba sülen Kingniu Cultural Troupe-i süngkong tema liasü. Sentong nungsa Khiamniungan Baptist Churches Association Executive Secretary Rev. Hempao-i Tsüngrem temaotsü meshizüka sarasadem aser iba sülen Kingniu Village Council Chairman, Lusang-i lokti pela agizükba o jembia liasü.

Chingthur Foundation (CF), Executive Director Rev. Dingshungngamang Kamei-i, benjung amungba nükjidong aser iba benjung ya kodaser

amung tenzük iba indang jembi. Pai, 2019 küm nungi CF inyakyim bilemtetshia jembi. Paia, development atema lokti tashi amshitetsü, ta ashi. "Jenjang menjang benjung ya chiyongtsü indang dang masü saka iba ya taküm, maitsü aser tarutsü indang benjung ka lir," ta pai ashi.

Sentong nungsa Chingthur Foundation Board züngsem Pesha Khiamngan-i, sobaliba dak tera yangloker yimtsüng rongsenketzung jenjang yanglushitsü atema aluyimer aser artisan tem longjemer shilem agitsü ajungshia liasü.

Shisaluyimba ya taküm aser alima...

Shisaluyimba wadang nung yamaji melenshia aodang züzüa meli-i asenoka asen inyaksangshi tasatem (skills) tensa den apet liru medemtsü nüngdak. Education ya taküm piyong benshia aotsüba maparen ka lir aser angazüksüba yabo küm tatakzük maka, anungji, asenoki taküm piyong metangdangi angazüksü aser tangar dang nungi asenoka angazüksü aser asenia tangar dang sayutsü temulungtetba/tejangraba alitsü nüngdaker, ta laisa ajungshia liasü.

Tanü alima ainba ajanga asen taküm jenjang kanga tajungba kümogo. Saka alima kanga dang kera aindang tebilemdangtsütema aika adoker. Yimya tajungtem sama-a aoba, technology meshidaki amshiba, nisungtem tsüngta temeim aser tesentaktep samaba, pei ayak (identity) mejangjai akümba, item ya kanga dang shisadanga asenoki tongtibang shilem agitsü nüngdakba ajiteter, ta laisa tebilemba ashi.

Tetsü kaji mezüng tesayur dang masü saka tanurtem asoshi tatishitsü sayur ka lir. Anungji, lai tanur dang ashiba dang masü saka la taküm, libaliru jembishinü, yimyattem ajanga shitakba lenmang nung liteta sayutetsüla. Tanurtem kakat shisatsü bushiba nung yariba den parnok dang

libaliru aser sobaliba tajungtem sayutsüla, ta lai ashi. Alima renlokba den asen taküm melenshia aodang, pei ayak, sobaliba tajung aser nisung den tesentaktep mesamadaktsüi ajak nung lirumedema aintsü asoshi sayutsütettsüba asen tetsütem khuret tulu lir, ta laisa ayongzük.

Tanü asenok ya "Artificial Intelligence (AI)" aser "digital technology" tensa nung alir, iba den atongsema melitetra, iba ajanga tajangzük kechisa, aser iba indang tamakok aser teraksatem kechisa mebendangtetra, asen chir dang koda sayutetsü? Asenoki, makoker mangateter ta mesüi angazüksü aser metettsü merangtsüla, ta lai ajungshia liasü.

Tanurtem school nung osangtsüasang tapu ajak phone mesüra media sabang balala ajanga angur aser inyaker. Digital literacy-ji joko tenüngdaktsü ka kümogo. Saka digital osettem amshitsü metetba dang masü item amshiba nung tekümdangtsü kechisa lir, aseni meteta alitsüla aser aji chirnur dang sayutsü kanga nüngdaker, ta laisa tekümdangtsü olen shisem.

Loktiliba terenlok ta kodang südir, ibai ali rongsen/temetetba shisatsü mesüra tawa tanü terenlok dang masü saka nisungtem libaliru, tesentaktep, teyaritep, maongka agütsütepa

shilem agiba, item ajak nung lirumedema tejakleni aoba den külemi asen dak aliba yimya aser sobaliba tajungtem mesamadaktsüi wazüka yutetba densema lir, ta laisa ashi.

Loktiliba aser kakat shisatsüji sen chandi (coin) ka nung shilem ana aliba mesük. Tenaji kadi ka peridaktsür. Kakat shisatsü nung renlokba ajanga loktiliba nung temelenshi adokdaktsür aser loktiliba ainba den kakat shisatsüja melenshia aor. Naga nung aser Aor loktiliba koda tamangba yimsü aser education aruba ajanga asen lima temelenshi adok ta laisa medemdanga ashi.

Laisa Africa nung shin o ka lemsatepdang, "nai tebur ka educate asünung, nisung ka dang educate asür saka nai tetsür ka educate süra kibong, lokti aser alima ajunga educate asür". Iba ajanga agateter, asenok tetsür dak nungi alimai tulu ka imlar, aser asen teinyaktsüji aika dang lir, ta atishia lemsatep. Kibongji, lokti ajak tamendakdak, anungji, lokti ajungtsü mesüra aintsüji kibongtem dak tulu ka sentaka lir. Tetsü kaji kibong nung tongtired (backbone) ka mesük. Süra, tetsü ka ama aser tetsür telok ka ama loktiliba aser kakat shisatsü renloka aoba nung kechi shilem agiteter, ta laisa shisadangtsü o ka lemsatep.

Run 4 Green Dimapur sentong takok ngua agiogo

Dimapur, Rongjui/September 27 (TYO): Run 4 Green Dimapur shibangba sentong September 27 nü DMC Office, Dimapur nung agiogo. Iba sentong nung Dimapur Municipal Council aser District Administration, Dimapur Development Authority, Department of Environment & Climate Change, Nagaland Pollution Control Board, aser National Youth Climate Consortium aser Team Better Dimapur, Can Youth, aser Pro-Rural nung densema Partner NGO tem nungi ketdangsürtemi shilem agia liasü. Iba marathon asemtepba sentong ya tzümpung wazüka ayutsü atema tangazükba agütsütsü nükjidong nung agiogo.

Sentong ya Lensanaro lenisüba nung agi aser Chief Executive Officer, DMC Thungchanbemo Tungoe-i lokti pela agizükba o jembia liasü.

Run4Green Dimapur sentong indang jembiba mapang National Youth Climate Consortium (NYCC) nungi Boka Rochill-i, iba marathon asemtepba sentong ya yimti temelenshi atema inyakyim tetenzük lir ta ashi. Run4Green sentong ya asemtepba sentong ka dang masü saka Dimapur yimti temerekba aser talitsü tajungba kümdaktsütsü asoshi tapak tasen ka lapokba asütsü, ta Rochill-i ashi. Paia, iba sentong ya sustainable aser tzümpung wazüka ayutsü atema süoki ia agiba tarutsü ka yangertsü asoshi lokti aser talisa lanurtem nem shilem agidaktsütsü asoshi ayongzükba sentong ka lir ta ashi.

Maneni Rochill-i, iba setong ajanga mopung temerek, süngtong atemtsü aser tzümpung wazüka ayutsü atema tangazükba agütsütsü asoshi yimti nung alirtem, sorkar department balala aser lokti tentet balala longjemdaktsüogo, ta ashiba den iba inyakyim ajanga mapang talangka asoshi temelenshi bener arutsü atema ajungmesotsü aser Dimapur ya tanga yimti atema tzümpung wazüka ayutsü asoshi khuret angatetba dak sendakba nung nükrangdong ka kümdaktsütsü, ta ashi.

Sentong nungsa Earth Alliance, Nagaland Director aser Founding Member L.H. Thangi Mannen-i, Run for Green Dimapur ya sentong ka dang masü saka iba ya tzü mopung wazüka ayutsü asoshi jurila aser lokti tenangzüka ka lir, ta ashi.

Tarutsü tajungba ka asoshi inyakyim ya tanü tenzüksüla, ta Mannen-i ashi. Laisa, iba amala inyakyim ya maneni atsülanga ora iba ajanga taruba putu daka kongshitsü, ta ashi.

Lanurtem dang tejaklen sür len anitsü ajungshia lai lanurtem dang iba amala inyakyim nung yakyaka shilem agitsü ajungshi, kechiyong iba amala sentong ya sustainable aser tzü mopung wazüka ayutsü asoshi bilema aliba tarutsü ka yangertsü asoshi kanga tongtibang lir.

Maneni sentong nung EAC Dimapur, Imlijungla Lemtur-i, Dimapur yimti ya talitsü tajung kümdaktsütsü asoshi tang mezüngbuba sorkar agency balala longjemogo ta ashi. Sentong nung o jembiba mapang lai, tzümpung dak sendakba nung tetsükdaktsü balala alibatem bentettsü atema longjemer inyaksü koda tongtibang iba indang lemsatep. "Tang mezüngbuba sorkar agency tem aika ka küm longjemogo. Asenoki süngtong timba tema Dimapur ya tesem tajungba ka kümdaktsütsü atema teyari agütsütsüla," ta lai ashi.

Sentong nung o jembirtem ajaki, tzümpung dak sendakba nung tetsükdaktsü alibatem bentettsü atema takaratiba nung longjemer inyaksü nüngdakba lemsatepa liasü.

Iba sentong nung NPCB Member Secretary, Yanathung Kithan-ia o tatsüka jembia liasü.

Run for Green Dimapur sentong nung category balala nung nüburtem aikati jangrabangra shilem agiogo. Sempet agütsüba sentong ya Adrian M. Mahung-i achaayanga agia liasü.

Open Men's category Abhishek Yadav-i akok aser Prince Yadav tanabuba jenjang nung liasü. Open Women's category nung Tsuchoi T mezüngbuba aser Songmo P tanabuba jenjang nung liasü. Junior Boys' category asemtepba Chuimthang Zimik-i akok aser Andan runner-up liasü. Junior Girls' category nung Supai S mezüngbuba aser Apong N tanabuba jenjang nung liasü.

Marathon asemtepba nung ajak sentepet nisung 687-i shilem agi, kong Open category nung asemteper 227 (tebur 164 aser tetsür 63) aser Junior category nung asemteper 460 (tebur 320 aser tetsür 140) liasü. Iba sentong ya C. Thsapise Anar-i tepela o jembir tembang liasü.



India lima ajunga nung 17th Sept nungi 2nd Oct 2025 tashi tetsür aser tanurtem anema alitsü asoshi Swasth Nari Sashakt Parivar Abhiyaan (SNSPA) ta sür sentong ka tenzüka agia arur. Kasa sentongji 26th Sept nü Longkhum Primary Health Centre nunga nisung 90 shi temang reprangba den tetendangba balala agia angati mozü lema agütsü. Iba sentong SMO, Dr. Tsumsumenla Longkumer aser M.O, Dr. Maongtula lenisüba nung department nungi staff balalai yaritepa takok ngua agiogo. Mokokchung 27th September, 2025



September 27, 2025 nü Leh nung curfew ozüing benoka lia security sepaitemi yimti tesem balala anükba noksa nung angur. Leh nung longkak aيتدang rara adoka nisung pezü asüba aser aika yiruba sülen Bodhbar aonung nungi curfew ozüing benoka lir.

Rara anentsü atema Pakistan-i India dang mepishi: India

New Delhi, Rongjui/September 27 (Agencies): Hokolbarnü United Nations General Assembly (UNGA) senden nung jembidang Pakistan Ato kilonser, Shehbaz Sharif-i jembiba o aija India-i, Operation Sindoor mapang nung rara anentsü atema Pakistan sepaitemi India dang mepishia liasü, ta metetdaksü. India-isa, India aser Pakistan na dak sendakba ken otem nung tasembuba telok ka tiyongtsüi aita shilem agitsü menüingdak, ta metetdaksü. 80buba UNGA senden nung Pakistan Ato kilonseri jembiba sülen telangzüba agütsüandang India's Permanent Mission to UN nung First Secretary, Petal Gahlot-i, "Tanep iba senden nung Pakistan Ato kilonseri

tamasa aiba asenoki nguogo. Maneni pai kiralongra tenüing sangogo aser ibaji parnok indang foreign policy nung tongtibang shilem ka lir," ta ashi. Pakistan Ato kilonser, Sharif-i, nuclear hadir aliba linük ana (India-Pakistan) tsüingda rara tulu adoktsü liasü, ajisüaka iba rara nokdangba nung United States Tir Donald Trump-i tongtibang shilem ka agia liasü, ta metetdaksü. Paisa, Trump-i alima nung yimjung atema inyakba asoshi Pakistan-i Nobel Peace Prize atema Trump shimmer, ta metetdaksü. Sharif-i, "Iba lima nung yimjung ajungkettsütsü atema Tir Trump-i kanga junga inyakba aser shilem agiba

ajanga Pakistan-i Nobel Peace Prize atema pa shimogo. Onoki inyaktettsü ajak agi ibaji dang. Atangji pa ya yimjung nisung ka, ta ni bilemer," ta ashi. US Tir Trump-i, pai tiyongtsüi ia inyakba ajanga Pakistan aser India na tsüingda rara anen ta aiben jembia aruogo aser tang Pakistan Ato kilonser Sharif-ia India aser Pakistan na tsüingda rara anenba nung Trump-i tongti shilem agiogo, ta jembir. India-ibo, linük ana tsüingda rara anenba nungji tasembuba telok kati shilem agia mali, ajisüaka Pakistan Director General of Military Operations-i rara anentsü atema India DGMO dang mepishiba nung ajemdaker rara anen, ta metetdaksüogo.

LoC anasa launch pads nung kiralongrartem aika lir: BSF IG

New Delhi, Rongjui/September 27 (Agencies): Line of Control (LoC) tesem balala nung launch pads nung kiralongrartem aika lir; asükwa mongpu matongdangsa parnoki Kashmir telungi aittsü merangtsü, ta Honibarnü border security force (BSF) nung tongti ketdangser kati metetdaksü. BSF Kashmir frontier nung Inspector General (IG), Ashok Yadav-i, rürjep alaba mapang atongtsü lia kiralongrartemi linük telungi aittsü merangtsü, ta metetdaksü. "Küm shia rürjep

maladangyongi kiralongrartemi arrtsü adena aittsü meranger. Ano ita ana shi lir, anungji November ita matongdangsa parnoki arrtsü adena aittsü merangtsü, ajisüaka asen sepaitem kanga yakyaka lir, anungji kiralongrartem arrtsü adena aittsüji kanga tasak asütsü," ta Yadav-isa metetdaksü. LoC nung Bandipora aser Kupwara sectors nung aliba launch pads nung kiralongrartem aika arrtsü adena Kashmir telungi aittsü renema dang lir, ta pai metetdaksü.

"Parnoki arrtsü adena aittsü atema maongka bushir, ajisüaka asen sepaitem kanga yakyaka lir. Khenkhenbo parnoki arrtsü adena aittsü atema tsüingsang-mopung tamajung atar. Army aser BSF napronglai LoC nung technology tasen balala amshia tsükchirtem mita repranger," ta pai metetdaksü. "Army den külemi onoki LoC tesem ajak ayimjema lir. Taküm küm tenzüker tang tashi nung sepaitemi kiralongrartem arrtsü adena aittsü merangba anaben tashi nokdangtetogo," ta paisa shisem.

Bareilly nung 'I Love Muhammad' rally nokdangba agi longkak ait

New Delhi, September 27 (Agencies): Hokolbarnü Uttar Pradesh kübok Bareilly nung 'I Love Muhammad' rally nokdangba agi Muslim nungertemi tejashi nung longkak aita police den rara, aser iba dak sendakba nung Honibarnü Police-i Muslim nunger yimsü lenir aser Ittehad-e-Millat Council nung tongti, Tauqeer Raza Khan puogo. Khan-i 'I love Muhammad' campaign pusema longkak aittsü ajungshia liasü. Hokolbarnü sarasadem sentong tembangba sülen mosque kima Muslim nungertemi longkak aita police den rara. Parnok ket nung 'I Love Muhammad' ozülu amer liasü. Honibarnü osangbenertem den jembidang Bareilly SSP, Anurag Arya-i, "Tauqeer Raza pua police station-i anir ogo aser pa anema ken o akatsü. Tangbo tensa süngjemogo aser tensa azüokteta lir," ta metetdaksü. Tauqeer Raza Khan-i ayongzükbba sentong agitsü mapang ana nung lia ketdangsertemi iba sentong ajungbena thinentsüba agi lokti kanga jashia liasü. Lokti jagi longkak aita police den raraba sülen police-i nisung 20 dak tali apu. Lokti jagi long amshi aser kiojen-a raksaja liasü. Hokolbar aonung Raza

Khan-i video ka ajanga, lokti den jembitsü atema pa nem temelaba magütsü aser pa 'house arrest' asü, ta metetdaksü. Paisa Hokolbarnü longkak aيتدang yirurtem nem tenüingsang agüja, "Iba sentong nung shilem agir lanur ajak nem ni tenüingsang agütsür. Iba sentong nung yirurtem nem-a tenüingsang agütsütsü tetemtsü," ta metetdakja liasü. "Yimsü dak sendakba sentongtem nokdangtsü merangra shingaia ola madoki malitsü. Hokolbarnü ni sarasadem sentong jagi otet asübo yamai matalokla. Muslim nunger dak ajok agi azük. Tang ni 'house arrest' süa lir. Ni apu asübo ni kanga pelala. Atiq Ahmad dak injang khaloktsüba ama kü dak-a injang khalokjang. Iba linük nung nütsüing crore 140 ji sorkari reprangtsüla, ajisüaka telok ka anema dang inyakba ya onoki magizüktettsü," ta pai metetdakja liasü. "Tang tatalokba yabo Hindu-Muslim tsüingda rara masü, saka police-i Muslim nungertem anema tashiyim amshiba lir," ta pai metetdaksü. AIMIM party tongti lenir, Asaduddin Owaisi-ia, "I Love Muhammad" ya ozüing alema inyakba mapa ka masü, ta shia ketdangsertem aitsüogo.

Sonam Wangchuk-i Pakistan den tesendaktep ayur: Ladakh DGP

New Delhi, September 27 (Agencies): Honibarnü Ladakh nung Director General of Police (DGP), SD Singh Jamwal-i, Ladakh atema state jenjang takhangba agüja lumai longkak aitsang, Sonam Wangchuk-i Pakistan den tesendaktep ayur, ta tai tongloksü. Ladakh nung lanurtemi longkak aita police den raradang nisung pezü asü aser aika yiruba den külemi BJP office aser sepaitem gari rongdokja liasü. Iba tatalokba sülen Hokolbarnü National Security Act (NSA) kübok Wangchuk apu aser Rajasthan nung aliba Jodhpur Central Jail-

i anir ogo. Leh nung osangbenertem den jembidang DGP Jamwal-i, Wangchuk den tongtepratepa alisang Pakistan PIO (intelligence officer) ka police-i puogo, ta metetdaksü. "Tawa onoki Pakistan nunger Intelligence officer ka apu. Pai (Sonam Wanhchuk) Pakistan nung sentong ka nung dena liasü. Pai Bangladesh-a semdangogo, anungji iba nungji tashishitsü lir. Pa anema bushisüngdangdar," ta Jamwal-i metetdaksü. Jamwal-isa, September 24 nü Leh nung longkak aitba mapang nung Wangchuk-i ozüing alema inyaktsü atema lanurtem ajungmesoa liasü; iba tatalokba nungji nisung pezü asü, nisung 80 dak tali yiru aser kiojen rongdoktsü, ta metetdaksü. Leh nung tensa raksaba atema sorkaria Wangchuk nem tai tongloksüogo. Ministry of Home Affairs (MEA)-i, Wangchuk-i Arab Spring, Bangladesh nung nüburtemi longkak aitba aser Nepal nung Gen Z lanurtemi longkak aitba indang jembiba ajanga Leh nung lanurtem ajungmesoa longkak aitertemi BJP office rongdoktsü aser sorkar gari kar nung mi senokja liasü, ta metetdaksü.

इंडियन बैंकIndian Bank ALLAHABAD Zonal Office : Dibrugarh T.R. Phukan Road, Chiring Chapori, P.O.: Dibrugarh- 786001 E-mail: zodibrugarh@indianbank.co.in		KIOJEN AYOKTSÜ SANGDONG	APPENDIX- IV-A [SEE PROVISO TO RULE 8 (6)] KIOJEN AYOKTSÜ SANGDONG Securitisation and Reconstruction of Financial Assets & Enforcement of Security Interest Act, 2002 aser Security Interest (Enforcement) Rules, 2002 nung Rule 8 (6), 6 (2) & 9 (1) kübok kiojen ayoktsü atema E-Auction Sale Notice.
Public aser talisa sen apur (tem) aser Guarantor (tem) dang ya sangdonger, Secured Creditor dang mortgaged/charged süa aliba tsünglanglen shia aliba kiojen ya Indian Bank nung Authorized Officer-i agiadokogo aser iba kiojen ya 17.10.2025 anogo nung "Kong koma ali", "Koma lidir yamaji" aser "Yangji aliba ajak" basis nung ayoktsü. E-auction ajanga ayoktsü aliba kiojen indang osang tejangja tsünglanglen metetdaksür:			
Branch	A) Name of the Borrower/Guarantor/Mortgagor B) Due Amount	a) Details of the Immovable Property b) Property ID No.	a) Reserve Price b) EMD c) Bid Increment Amount d) Any Encumbrances on property
Mokokchung	A) Sen apur aser Mortgagor- Sri Bokato Nikhevi Chishi, S/o Nikhevi, Address: North Point Colony, Zunheboto, Nagaland- 798620 B) 17.01.2024 anogo tashi nung Rs. 17,65,596/- (Rupees Seventeen Lakh Sixty Five Thousand Five Hundred and Ninety Six Only) iba denji further interest, costs, tanga charges aser teindokba balala.	a) Village North Point Colony, Zunheboto, Nagaland- 798620 nung Registered Sale Deed No. 320 anogo 26.10.2015 nung Patta/Permit No. 1687 of Dag/Plot No. 43(A) (P.T. No. 4) kübok Sri Bokato Nikhevi Chishi, S/o Nikhevi tenüng nung aliba ali tasazük 630 sq metre aser yangji aliba kiojen ajak. Butted & bounded by:- NORTH- Kasheto, SOUTH- Akheho, EAST- Approach Road, WEST- S. Toshili Zhimo. b) IDIB50340259679	a) Rs. 45,00,000/- (Rupees Forty Five Lakh Only) b) Rs. 4,50,000/- (Rupees Four Lakh Fifty Thousand Only) c) Rs. 10,000/- (Rupees Ten Thousand only) d) Not Known any
e-Auction anogo aser mapang: 17.10.2025 nikongdang 1:00 ako nungi nikongdang 5:00 ako tashi aser mapang shia telatet makai minute 10 atsülangtsü		EMD sen agütsütsü atema tatembangbiba anogo aser mapangji: 17.10.2025 anogo nung nikongdang 05:00 ako tashi.	
Osang tejangjaba atema concern Branch Manager : (A) Mokokchung : 9654482989; (B) Zonal Office Dibrugarh: 9628610699 den tongtepratepang Bid asütsüpurtem dang e-auction service provider PSB Alliance Pvt. Ltd. indang website (https://baanknet.com) nung online ajanga shilem agitsü metetdaksür. Technical Assistance atema 8291220220 nung call süang. Registration status aser EMD status atema support. baanknet@psballiance.com dangi mail süang. Kiojen osang tejangja den kiojen noksa aser auction atema telatetbatemji https://baanknet.com nung reprangtsü akok aser iba portal dak sendakba nung metetpelatsü atema PSB Alliance Pvt. Ltd. den Contact No. 8291220220 ajanga tongtepratepang. Bid asütsüpurtem dang https://baanknet.com . website nung kiojen reprangba mapang nung tekalen shia aliba Property ID Number amshitsü metetdaksür.			
Date: 25.09.2025, Place: Mokokchung		Authorised Officer (Indian Bank)	



TIR YIMYIM YIMOBILEM (EDITRIAL)

DIMAPUR SUNDAY, SEPTEMBER (RONGJUI) 28, 2025

Na kong lir?

Na kong lir? ta asüba o ya asenoki anogoshia bangpet süa asüngdanga jembiba o ka lir. Na kong lir? ta asüba o ya asenoki tanü asüngang jembir masü saka temeshi laishiba nunga reprangdangra Lipok kaket nungji kasa o ya shia angur, ibai alemli Adam aser Eva-la nunger mapang nungi jembia aruba o ka lir. Ibaji yamai: "Nikongtsütsü tenati [Adam aser Eva] Kibuba Tsüngrem atsüki nung jajaba angashi aser tenati Pa tsüngdang nungi atsüki süngdongzüng nung atsüka ali. Saka Kibuba Tsüngremi nisung dang jaa ashi, 'Na kong lir?' Lipok 3:8 - 9. Kechiba Tsüngremi nisung bushi? ta sürabang, Paji temeim agi sünga aliba Tsüngrem asüba ajanga lir. Pai memeim asübo 'Na kong lir?' ta ya masüngdangba, tetezü pai meimchirji mebushila. Tsüngremi nisung shinga sendoka mali. Pa tsüngdang takar sensaker, tulur tilar, tetsür tebur, tanur tain ajak kasa. Pai meimchir ajak sakuku meimer. Tsüngremi temeshi nisung koda meimer kasaji ano temenenpur danga meimer. Pai meimchir shinga temenen nung mesamadaktsüner. Pa tsüngdang tanela ajakji senti lir. Iba jagi, Tsüngremi nisung shinga mesamadaktsünüba ajanga "Na kong lir?" ta asüngdanga tsüngdong bushia aru. Aji oda süaka, alima meimchir ya anogoshia iba lima nung tia balala ajurua liyonga aodang memeteti aiben tatidang nung tsüker aser Tsüngrem nungi pilaadoker alir. Asenok taküm ya kodang Tsüngrem nungi tera pilar lidir, mesüra asen kibong telung nung temeim tera mokonga kümer lira, mesüra azümesen nem kokdaktsür sarasademtsü mejangrai lira, idangji temenen mojingji asen taküm aser kibong telungi aita atidangtsü renema lir ta metettsüla. Iba denji ano, asenok azümesen nem kokdaktsür sentepi aotsü mejangrai tanela nung azülar alidangbo mojing tatidang nungji melamela tsüksü. Asen mapa nem kokdaktsür Temeshi laishiba azüngtsü mapang makai alidang yakta mojingi chance agiadoktsü. Ano kibong nung, telok nung aser medemer tsüngda nung tesendaktep aser temeimtep samar alidang temenen nem yakta mesüzükdaktsütsü. Tememen mojing ya kanga shisa taka, pai mapang ajak nung meimchirji mesüzüka temenen nung tsükdaktsütsü lenmang dang bushia alir. Anungji mapang ajak nung asenok atidangtsü asoshi mojingji asenok sülen lir ta metettsüla. Aji oda shia aru ama, mojingji kanga shisa taka asünungji pai asenok tenla kidang alidang mesüra laishiba zünga sarasadema alidangbo matidangtsü. Saka pai asenok kija azüngmeyaka alidang aser tia balala nung alidangang atidangtsü. Temenen tatidang ta asübaji tekolak nung tezü talangka dener, tepu küpteter, ku waar asenok dangi marutsü. Saka asenoki meimba mesüra sabuba langka agi pai atidangtsü. Idangji asenok tamang mita melira tenük masepshi nung temenen nungji tsükadoker alitsü. Anungji mapang ajak nung asenok tamang mita aser Tsüngrem den tesendaktep shitak alitsübaji tongtibang. Longben ya tesempatsüka, saka temenen jagi tobur tajung shinü dang sayutsü. Idangji asenok saksalema melira memeteti mojing nemji mesüzükdaktsür alitsü. Alima nung temenen tatidang nung metsüker mali, saka nisung aikati temenen nung tsüker külen Tsüngrem bushitsü melena Pa nungi talangba talangba dang jena aor. Temenen nung tsükadoker Tsüngrem nungi jena aotsü merangaka tejenokdakji kodanga mangutsü. Shibai aji mangatetdir pa/la takümji ayatai nung tembangtsü. Kechiaser Pa tsüngdang nungi jena aotsü makok. Laishiba nung yamai shia lir - "O Kibuba, Ne tanela nungi ni koloni aotsü? Mesüra ne tsüngdang nungi ni koloni aotsü? Ni anüng temaleni tura, na yangji lir: Kü yipten Sheol nung yanglura, ajiang na yangji lir. Ni anepdang tashikang tener, aser tzüym tatembang nung oa lira; Oda idakja ne teka agi ni anitsü, aser ne teka tajichi agi ni amettsü..." T. Ken 139:7-10. Pa dak alema shinga mali, alima meimchir shinga mesamadaktsütsü asoshi Pai anogoshia asenok bushia kishizüng nung akokshia "Na Kong Lir?" ta asüngdang. Tsüngremi meimchir bushibaji temenen nung taküm mesamadaktsüi küm meyirijangsa meyirijang aika tepela nung Pa den alitsü asoshi tekümtet agütsütsü bushir. Anungji Pai 'Na kong lir?' ta bushia arudang jena aotsü memerangi asenoki yakta 'ni yangi lir' ta langzütettsüa anogoshia asen taküm renema alitsüla.

OLEMSABANG

Asen Lima Senso Tajung Ka??

~ S. Nuken Longkumer, Naga United

Naga Senso Tajungibo Naga nunger linertem majung mejembir! Ano M.L.A Minister tem majung mejembitsüla!! Kechi tarutsü nükla tajungtem lir, iba dak rangloker tajungtiba inyaktetsü ajungshi teptsüla!! Tesüiba mapang tajung aser tamajung kechisa inyak süitemogo tanü putu lanurtemi asen tsürabur timatempa memetetsü!! Ano mangatetsü, kechiaser parnoki mangu, majangshi!! Anungji asenoki otzüemji zülua toktsütsüla?? Negro nungertem American nunger alar tia ajuruba sülen par tsüraburtemi Tsüngrem dak amanga azüit!! Tanü alima nung Negro nunger nüngtugo kümogo!! Oztü angatetra meranga inyaker takok angutsü merangangma, mejanga dang aliba nisungi kodanga tangar memenüptsü!! Alima nung tetsü oshi, kipong telung nung tetsü oshi yutsür tangar oshi jembibaji tai lir?? Israel nunger tang Tsüngremi yamai shia angur, tetsü oshi amadokba Israel kin, temenen benshiba kin ni nenok alima sünga aridoktsü?? Tetsü oshi ya Hon ama alitsü tanü asen kintemi yamaji inyakogo, sensakeri takar ayibaji alimai koda repranger!! Missionary maparen nung aika inyaka lir!! Asüng na takar asütsü akok!! Iba tensa nai tsüraburi kechi inyaker jembir temji pei chirnurtemi inyaker!! Ochi nung tatemang mali- na ochishia alinungbo tsükchirtem tsübuttsü mali. Naga lanurtemi ochi ola adoktsü tang ya mapang tajung!! Tanü asen lima nung tongtipangtibaji F-H- Road ya ka lir, ibai mapa küma inyaktsüla ta ochi ola adoktsüla!! Tang aliba Govt. parnok den otzü opang tajung lemsateptsüla, kechiaser iba mapa par chuba menden nung yua lir!! C.M. Rio ya tangatetba taküm tekoro mali, teyarinü taküm anungji Tsüngremi arishia pa menden nung toktsüa lir!! Tinyaktsü aika lir, saka item ajak rongnung F/H Road ya Naga nunger atema tututiba aser temaba jengjang nung lir!! Iba den Paper Mill samaogo saka taküm lir, Medical College den, Industry amala mapa jendi kar tzümopong temerük- tesangwa ya onsara tang asen meimchir asoshi onsara tongtipangtiba!! Item ajakji takok angutsü atema cari lemangya tulutiba senti oset hon ama bilemdaktsünür. Tulurtemi mepongning rasar ama tekümtsüma. Iba den sendaktepa ano, I.L.P ama N.R.C amala mapa jendi tesülen toktsür amai lir, saka lanurtem aikati temulung agutsüa inyakba angur aser inyakdar kanga penlarasüang. Asenok yamai kechiba sowar akümtsü!! Asenokbo otzü kar lemsatepdi no!!

- 1) Ya tanü putu Naga nungeri tashi mangar
- 2) Naga nungeri tashi mangar mapa memetet!!

Tila mekümteter aser azümesenertem lir ta jembiteper. Iba mapa aser sendong yagi tatem atongtsü asü?? Naga nunger lenir tajung?? Sayutsü melena aser meima bilemtsü tim!! Sensakertem süang ano nür jala jabasotem nungtem külen kidangmoka tanü tashi kazütepdar!! Aji shirnok Naga nungertem!! Ochi mapa yimdong nung mejanga lir?? Saka teyarir Shinga mali! Taoba mapang osangkaket nung ashi ama, ochi o teratet ashitsüla?? Naga lima politic ans:- R.P.P lenir Wapong- Mr. Vithozao ajanga yama ayongzük, Naga nunger khuret?? Dimapur ama Kohima nungbo jangratemtsü tulu lir!! Luxury ama Naga limaji? Saka Nagalima tezülenbo tepilemtsü tulu lir, yamaji ochi o ayongogo?? Tanü Naga lima telungji reprangra tetsübuttsü aser teraksa agi sünga angur?? Asen lima tereprangtsübo junger! Nungtugo sayutsüngir ama, tebor onsara tajung, saka shingai manguba temulungjang tarok tanaktiba temenen agi sünga aliba taküm ama asen lima tiajitemenen nung tsüka lir?? Naga lima aser Naga nübur asoshi karibo iba ama ochi lepzüka yoktsü tim lir?? Taoba mapang K.K Semai Naga nunger asoshi ochi o jembia arogo kanga penlar Tsüngremi arishi talang moajangma. Ochi jembiteper tang nokinketer ta ajar?? Sensaker atema ayuba Rongsen achirtem tenük agi manguba mesen agi achitsü!! Ochi rongsen aika lir, anungji otzü zülurtemi ashibaji aibenlena mangatetsü merangang!! Asen lima kibong aika aen jembiba angashiogo!! Par ki Hospital kümer lakh aika indokba angashiogo!! Ochimashi Rongsen!! Tanü tangar lima majungba indang mejembitsüla!! Asen Nagalima yabo Missionary lima asütsü nangzüka lir?? Laishiba Tsüngrem o nung süngdongzüng nung süngrangtsü aser pu ataloka lir ta shiogo! Alima nung ochishia bendenba takar aika arishia lir?? Ochi nung takoksa mali!! Election mapang sen teperi agütsüogo leman yanglutsü tasak kümogo?? Asenok nüpurtema tai masü no?? ochi lemangi meyiptsü apusoang?

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Impur nung ABAM-i ayongzüka Mission Conference agiogo



Impur nung ABAM-i ayongzüka Mission Conference agiba mapang tangokba noksa nung angur.

Impur, Rongjui/September 27 (TYO): ABAM Church & Mission Ministry Mission conference September 24-26, 2025 anogotem nung "Apusodi" (Yohan 9:4) omen nung ajemdaker kanga takok ngua agiogo, ta Honibarnü ABAM Executive Secretary, Rev. Temsü Jamir-i sangdong ka ajanga metetdaksü.

Tenyaba mapa ya Arogo mulungjang, aser ibaji taküm alitsüji Tsüngremer mulungba aser Yisu tesayuba lir. Tanü iba tangatetba nung ABAM aser Arogotemi linük balala nung missionary tem yoka aika Tsüngremer yimlil anir arua temoatsü agia odar.

Küm asem nung khen iba sentong ya ayongzüka akar aser 2025 küm kangasa tajangjemba

nung iba sentong agiogo. Sentong Omen nung ajemdaker o jembirtem parnok asem liasü; Rev. Temsü Jamir, Executive Secretary, ABAM ajanga 'Apusodi Tajaba' onük jembi, Rt. Rev. Dr. Paul Swarup, Bishop of Delhi (CNI) ajanga 'Apusodi Renemba' onük jembi aser Rev. Yapang Mollier Secretary, Church & Mission Ministry, ABAM ajanga 'Apusodi' onük jembia liasü.

Iba conference sentong nung tongti shilem ka agibaji shisa lemsaba mapang liasü. Iba shisa lemsa mapang telok pezü lemsaer onük pezü agi. Mr. C. Bendangmeren Jamir, Mission Director, Chuchuyimlang Baptist Arogo ajanga "Becoming a Missional Church" agi, Rev.

Onenlemla Missionary IM ajanga "Member care" agi, Dr. Moanükshi, Director, South East Asia Eas West Ministries International ajanga "Networking" agi aser Mr. Lipokwati Missionary ajanga "Sustainable Mission" onük agia ajak tangazükba nguogo.

Iba conference nung linük balala nungi Missionary tem 40 dak tema arua adenba den parnoki ajangshiba aser khuret lemsaba mapang tajung agia liasü.

Ajak agi Arogo 119 nungi Sannükertemi anir 701 arua iba sentong nung aden.

ABAM aser Arogotemi longjemmer nükla tuluba nung tayimjem tenyaba wadang inyaksü tamang sarasadem ayur.

2030 küm tashi nung UK nung Tenla ki 2000 shibangtsüa akok

September 27, 2025: Taruba küm pongu tsüngda (2030 küm tashi nung) United Kingdom nung Tenla ki 2,000 jungnüa shibangtsüa akok, ta UK charity National Churches Trust indang survey ka ajanga bushitetogo.

National Churches Trust yagi akhidang nungi aliba Tenla kitem wazüka ayutsü atema inyaker. Taküm May aser June ita na nung parnoki England, Scotland, Wales aser Northern Ireland nung aliba Arogotem nungi telangzüba 3,600 ngua liasü aser iba nungji ajemdaker iba survey renema liasü.

Iba survey agiba ajanga bushitetba report ajanga ashiba agi, Arogo aikati tarutsü nung parnok Tenla kiji taküm alitsü ta ashi saka Arogo karibo küm ishika tsüngda parnok indang Tenla ki shibangtsüa akok, ta metetdaksü.

Survey nung shilem agir shilem 70-i 2030 küm tashi nunga parnok Tenla ki alitsü aser tekülem sentong tagidak alitsü ta ashi, shilem

26-i Tenla ki ano küm aika alitsü ta ashi saka shilem 5-ibo 2030 küm tashi nung parnok Tenla ki alitsü asü shibanger alitsüar memetet, ta ashi. Iba tetezü UK nung Arogo 20 shia nungi katibo Tenla ki shibangtsüa akok.

Talisa yimtsüngtem nung aliba Tenla kitem aika shibangtsüa akok, ta survey nung shilem agir shilem 7-i telangzüba agütsü.

Iba tetezü, taruba küm pongu tsüngda yimtsüngtem nung aliba Tenla ki 900 shi shibangtsü.

Ano denomination balala sasep nung Methodists shilem 12-i 2030 küm tashi nung parnok Tenla ki shibangtsüa akok ta ashi aser Presbyterians shilem 9-i taruba küm pongu tashi nungbo parnok Tenla ki shibangtsüa akok ta ashi.

Baptists aser Independent Arogotem nungi züngsemtembo shilem ishikati dang küm pongu tsüngda parnok Tenla ki shibangtsüa akok, ta ashi.

Ano Anglicans shilem 4-

i küm pongu tsüngda parnok Tenla ki shibangtsüa akok ta ashi. Anglicans shilem ishikati dang parnok Tenla ki shibangtsüa akok, ta shiaka Anglican Arogotem teimba lir, anungji parnok Tenla ki 700 jungnüa shibangtsüa akok.

Grade I list nung aliba Arogotem teimbakati 2030 küm tashi nunga parnok Tenla kidang tekülem senong agia alitsü, ta ashi.

2030 küm tashi nung Cathedrals bo ajak lapoka alitsü, ta iba survey ajanga bushitet.

Kasa survey ajanga, 2030 küm tashi nung Tenla kitem teimbaka lapoka alitsü aser yimtsüngtem nungbo Tenla ki aika shibanger alitsü, ta metetdaksü.

Talisa denominations dak sendakba timtem balala aser senotsü tsütsü tetsükdaksü balala ajanga taruba küm pongu tsüngda UK nung Tenla ki 2,000 shi shibangadoker alitsüa akok, ta National Churches Trust-i metetdaksü.

ANO GO ABEN TSÜNGREM DEN

TAJUNG INYAKTSÜ

ANGAZÜKANG

"...tajung inyaksü angazükang; ochi benshiang, rishikangshir noktangang, tebu malir o bendangjang, amitsürtem temeten asoshi noktakang." Isaia 1:17

Yisu dak amangertem dang tajung inyaksü? angazükang ta ashiba yabo tangatsü nung tamashi o ka ama lir. Kechiba ta süra tamangertemji mashidang yongi tajung inyaksübapurtemji lir. Saka kechiba inyakanga, angazükang ta ashir ta süra, tajung dang inyaksübapuri tamajungang inyaksü jangra nung asenok dang iba oji ashir.

Mapa tajung inyaker meinyakma, kechiba tamajung inyakba nung pela-a alitsü? Ochi nung teti temoatsü lir ta meteta yur kechiba atakatemang bendentsü? Reshikangshiba mapaji teyanglur Tsüngrem anema inyakba mapa ta meteter kechiba inyaksü? Lajar tsürabur mabensaba tanurtem, alima shi nung tepela agi meperiba tanurtem kechiba mezüngmeshitsü? Amitsürtem kijai kibong khuret bener nokdakbapur kechiba majiteter aser par temeden magütsüü ala-shidaksutsü?

Tsüngremibo nisung ajak küsa dang yanglu saka nisungi yamaji inyaktet nung Tsüngrem O jagi ashir, "Tajung inyaksü angazükang." Na aser ni koba nung dena lir? Alimaji manger mesangwa nung tajungba kümer matatsü saka nisung shiai tajung inyaksü angazüker ajak den kasa lira alima nung temelenshi adokba aseni angutsü. Idangji Tsüngrem mepelali ma? Tsüngrem peladaksür rong nung na aser ni ka ka asütsü merangdi ta ayongzüker

Narongjakertem atema 'Jesus: A Deaf Missions' film saya tenzükogo

September 27, 2025: United States nung narongjakertem atema yangluba Khristan film Jesus 'A Deaf Missions Film' CTN ajanga sayu tenzükogo.

Tang mezüng American Sign Language (ASL) nung Yisu film ya yanglua tangok. Iba film nung Yisu Khrista shilem agisang nungi tenzüka film nung shilem agir actor aser actress ajaki American Sign Language meteta lir.

CTN (Christian Television Network) ya Dish, DirecTV aser United States tesem balala nung air stations 20 dak tema nung angutsü.

Jesus film ya Honibarnü, September 27 nungi tenzüka nikongdang 6:30 ako nung sayar. Film Director Joseph D. Josselyn-i, American Sign Language ya ajanga narongjakertem den sendakteptetsü, ta metetdaksü.

Joseph Josselyn-i, "Ni densema tenarong tajakertemi aiben film reprangdang actor temi jembiba dang repranger aser screen nung adoktsüba ozülü (captions) nung dang metaloktsüsa akümer. Ibayongji tenarong junga alir kati film angateta reprangba ama onokibo mereprangteter," ta metetdaksü.

Paiza, "Narongjakertemi ASL nung noksa balala

angudang pelar. Saisapong süaka, osangtsüasang süaka mesüra onük balala süaka ASL nung reprangdang pelar. Ozülü nung adoktsüba yabo screen nung English oshi nung adoktsüba dang lir. Ajisüaka American Sign Language yabo oshi tabensa ka lir, iba nung ya sobaliba maitsü lir. ASL nung film adokbaji ozülü adoktsüba dang nungi tajungba, kechiyong iba ya narongjakertem melungjang oshi lir," ta metetdaksü.

Narongjakertem atema Khristan film tajungtibaji asütsü atema film nung shilem agir ajaki Sign Language ajanga jembitsüla, ta pai ashi.

"Film nung shilem agirtemji narongjakertem lir, aser ibaji ajanga narongjakertemi film otsü denji kanga junga sendakteptsü. Joko oshi ya tetsükdaksü ka masü. Narongjakertemi iba otsü jungjunga angatetsü aser Khrista osangtajung metettsü," ta Josselyn-i ashi.

Alima nung narongjakertem shilem 2-4 shii dang Khrista sülen anidaker, ta Deaf Missions-i metetdaksü.

Josselyn den külemi film nung shilem agirtemi American Sign Language ajanga Khristan film 'Uncondemned' tama tendangba sülen ang Jesus film tangoka liasü.

Iran-i UK, France, Germany nungi envoy tem jaokogo

Tehran, Rongjui/September 27 (Agencies): United Kingdom, France aser Germany nungeri Islamic Republic nem United Nations' indang sanction tanaben benoktsü atema jenjang agiba sülen Iran-i item linüktem nungi envoy tem ken o jembishinütsü atema jaokogo.

"UN Security Council indang bangzük koba aginer lir iba ya benokshitsü atema Europe nung aliba linük asem yagi jenjang agiba sülen Germany, France aser United Kingdom dangi yoker aliba Iran ambassador tem ken o sensaksemtsü atema Tehran-i jaokogo," ta state news agency Tasnim aser tanga media sandong balala ajanga Honibarnü metetdaksü.

UN Security Council nung Iran nem tenokdangba agütsüshitsü atema Russia aser China nati menokdangtetba sülen tang iba jenjang ya agiogo. Council senden nung linük 15 nungi pezüi dang parnok tepu aküm, aser iba ajanga parnok nem tenokdangba balala agütsüshitsü atema lenmang lapoktsüogo.

E3 linüktem yagi UN sanctions benokshitsü atema asadangtsü asoshi anogo 30 nü züngzük inyakka liasü. Iran indang nuclear programme dak sendakba nung ken o tejangja memetdaksüba atema linük asem yagi parnok aitsüogo.

Tenokdangba ya Deobarnü 00:00 GMT nungi mapa küma inyak tenzütsü aser iba kübok alima ajunga nuclear, military, banking aser shipping industry dak sendakba nung Iran den teka amteper minyaksü atema tenokdangba agütsüogo. Honibarnü Iran indang national currency, rial kanga ajema aküm aser Tehran indang shishilembadak US dollar ka nung million 1.1 dak tema nung

tsütatepa liasü.

International Atomic Energy Agency-i Hokolbarnü ashiba agi, Iran nung nuclear site tem iba hopta nungi asadangshi tenzükogo, saka parnoki semdangba tesemtem nung US aser Iran nati bomb pokloktsüba tesem densema aliba mali iba indang osang magütsü. Item tesemtem nung nuclear material tem rema alitsü ta bilemer.

Moscow nung World Atomic Week forum atema or aliba mapang Iran indang nuclear telokba Mohammad Eslami maneni, Iran indang nuclear site tem anüng ajanga amakba aitsütsü memulungba atema UN nuclear watchdog aitsüogo.

Iran-i taoba anogo ana tsüngda inyakym thinena atatsü atema benokba anüolen aliba linüktem yagi magizük, aser ashiba agi ken o thinena atatsü atema parnoki kuli teperi mangur.

Iran tir Masoud Pezeshkian-i ashiba agi, Israel aser US nati par sorkar atsüngtoktsü atema nongshiba mapang tenangzüktepba ka yanglutsü atema kecha nüngdak mali.

"Nükjidongji nuclear programme dak sendakba ken o bentettsü atema süra onoki ajibo mela mela inyaktettsü," ta Pezeshkian-i osangbenertem dang ashiba den, Iran-i nuclear weapon yanglutsü kodanga memerangtsü ta maneni nenshia metetdaksü.

Paisa, hai haura ka-a ken o tangatettep ka dangi arutsü atema jenjang magitsü asoshi Europe nung aliba linüktem nongshiba atema US aitsüogo. Middle East dangi US envoy Steve Witkoff-i Bodhbarnü, US-i Iran meyirutsüner aser sensaksemtsü atema mulunga lir ta ashi, ajisüaka tang kechi

ataloka odor iba atema tenokdangba agütsüba ya tapet lir ta shisem.

Iran nongshitsü atema rongsenketzüng nung tenokdangba tasen agütsütsü asoshi tang iba tenokdangba ya agütsüogo, saka linük ajaki benoka inyaksü minyaksü ajibo mejangja.

Russian deputy ambassador Dmitry Polyansky-i Hokolbarnü ashiba agi, Moscow-i Iran nem tenokdangba agütsüba ya magizüker.

US aser E3 nati Iran nem tenokdangba balala agütsür lir aser tanga linük tem nema Iran indang totzü malidaksütsü merangogo, saka China nungi company temi maneni totzü alidar. Totzü aliba dak sendakba nung US-i China nunger company aika nem tenokdangba agütsür lir.

Trump-i pa mezügbuba term nung 2015 küm yangluba tenangzüktepba nung atsüngiba mapang takok tashi Iran nongshitsü merangogo. Iba nuclear dak sendakba nung tenangzüktepba ya tir Barack Obama mapang yanglu aser iba ajanga Iran nem tenokdangba agütsür aliba ajema aküm.

2015 küm tenangzüktepba yangluba kübok tenokdangba agütsür aliba tem aginer alibatem maneni benokshiogo.

Hokolbarnü Israel Ato Kilonser Benjamin Netanyahu-i UN senden nung o jembiba mapang tenokdangba agütsütsü atema menomeyanga malitsü ayongzükba den Iran indang nuclear programme amaksü atema Israel-i mulunga aliba lemsatepogo.

Pezeshkian-i ashiba agi, nuclear non-proliferation treaty nungi atsüngina Iran-i tenokdangba agütsüba atema jenjang magitsü.



Hokolbarnü 80buba United Nations General Assembly (UNGA80) nung Bhutan Ato Kilonser Tshering Tobgay-i o jembiba noksa nung angur. Pai UN Security Council (UNSC) nung temelenshi bener arutsü ayongzükba den permanent membership agütsütsü atema India aser Japan na temsüa lir ta ashi. Paisa permanent aser non-permanent züngsem naprongla atsülangtsü ayongzük.

Nepal nung longkak aiterem lenir election nung tokteptsü

Kathmandu, Rongjui/September 27 (Agencies): Nepal nung lanurtemi tawa longkak aita sorkar atsüngtokba nung lenir Sudan Gurung-i ashiba agi, pa taruba küm March ita general election nung tokteptsü. Paisa, nüburtem atema sorkar ka amenoktsü atema pa indang movement yagi tatem tashi nokdaksü, ta ashi.

Start Here's Sandra Gathmann den interview ka nung Sudan Gurung-i ashiba agi, traditional political party ka melenatemelelenshi atema inyakym ka tenzütsü asoshi linük ajunga nungi parnok pukümertem anidentsü asoshi par telok renema lir.

"Parnoki onok politics-i atsüoka sür ao," ta pai taoba sorkar memeruba aser sorkar kübok ochi mashi yimden yimsüsürtem indang ashi. Onok taruba election nung tokteptsü, kechiyong onok masetshitsü, ta paisa shisem.

Nepal nung Gen Z temi anir longkak aitba nung arishi küm 36 tain Gurung ya kanga tongtibang lenir ka küma liasü.

Sorkari Facebook, X aser YouTube densema social media sabangtem shibangtsüba sülen longkak ait tenzüka liasü. Company temi parnok mezüngoksem aser sorkar nem osang tejangja magütsü ta shia iba tenokdangba agüja liasü.

Saka longkak aitba sentong tamajungba küma ao aser lanurtem aika tepsetba den yirua liasü.

Gurung-i, linük yimsü asütsü atema par telok renema lir ta amanger. Volunteer temi legal aser communications committee tem tentetogo aser linük ajunga nungi Discord aser Instagram amala sabang ajanga policy balala bendendar.

Paisa, Nepali nunger ajak ola angashidaksütsü atema par team-i inyakdar, ta ashi.

Iba election nung Gurung ya independent candidate ama metokteptsü saka telok ka nungi tokteptsü sentong yangludar.

"Ni independent candidate ama toktepra lanurtem tashi malitsü. Longjemer inyakba ajanga onok tashi taitba kümdaksür," ta pai ashi.

Iba lokti tentet yagi ochi mashi inyakym atema dang raratsü masü saka Nepal nung tourism sector ajungkettsü, kidanger India aser China na den tesendaktep akangshitsü asoshia inyaksü.

"Asenoki parnok akümtsübuttsüla aser parnokia asenok akümtsübuttsüla," ta Gurung-i ashi.

Maneni pai, taruba elction nung yimden yimsüsür tejentem metoktepdaksüner ta shia interim Ato Kilonser Sushila Karki dang ochimashi inyakym aser longkak aiterem tepsetba takaratiba nung bushisüngdang asütsü mepeshia metetdaksüogo.

Pa Ato Kilonser kümner asü, ta asüngdangba mapang Gurung-i, "ni iba mapa atema tetemsü ta ni tangbo mashitsü... ajisüaka nüburtemi ni shimra ni iba atema tokteptsü," ta ashi.

Paisa, pa ajem ajema kümdaksütsü merangba indang jemi aser ashiba agi, nisung aikati pa tezüdanga kümdaksütsü merang, parnoki kü sülen anidaksü merang, parnoki ni tsübudaksütsü merangdar.

"Ni tsübuat mali.. ni tepsetba agi kecha majangzüktsü. Ni ozü linük kümzüktsü nüngdaker, kechiyong tang mesüra mekümzüktettsü," ta Gurung-i ashi.



Ittehad-e-Millat Council indang tekolakba aser local cleric Tauqeer Raza-i' Bareilly, Uttar Pradesh nung puogo. Pai 'I Love Muhammad' campaign atema ayongzükba sülen mepetmesü tulu adoka liasü. Pai iba campaign pusema video ka post asüba sülen par kima nisung aika adenshia liasü, ta ketdangsürtemi metetdaksü.

Sheetal Devi-i otsü tasen ka yaglua gold nguogo



Sheetal Devi

Rongjui/September 27, 2025 (Agencies): Arishi küm 18 tain India tsür archer Sheetal Devi-i Honibarnü otsü tasen ka yanglua Para World Archery Championships nung tetsür compound individual asaya nung gold medal nguogo.

Final nung Turkey tsür world No. 1 asayar Oznur Cure Girdi den asayaba mapang Sheetal-i 146-143 agi takok ngua la indang career nung takok tulutiba ngutetogo.

La takok ya kechiba tangar dang nung balaka ta süra, Sheetal ya teka maket aso aser la tetsüng aser teküm dang amshia asayar. Iba asayamung nung teka maketba asayar la kija lir.

Iba asaya nung medal anguba densema lai iba asayamung nung medal asem nguogo aser iba ajanga la ya alima nung asayar tajungtiba rongnung ka ya jangjatsüogo.

Mezüngbuba set nung asayar anapronglai point 29 ngur tembang, saka Sheetal-i tanabuba set nung perfect 10s asem ngua 30-27 nung tembang. Tasembuba set-a 29-29 nung tembang aser la point ana agi timba liasü.

Set pezübuba nung lai point 28 dang nguteta Girdi nem kokdaksü aser point 116-114 aküm. Ajisiüaka tatembangbuba set nung Sheetal-i maneni perfect 10s asem ngua lai la

indang career nung mezüngbuba world championship nung gold medal nguogo.

Semifinal nung lai Great Britain tsür Jodie Grinham 145-140 agi akok aser 2023 Pilsen World Championships final asayashitsü atema maongka nguteta liasü. Iba asayamung nungbo Girdi-i la 140-138 agi koka liasü.

Sheetal-i iba asayamung mixed team compound event nung Toman Kumar den senteper Britain nung Jodie Grinham aser Nathan MacQueen na 152-149 agi koka bronze medal ka ngur liasü.

Open team final nung lai Sarita Devi den longjemer silver medal ngua liasü. Tenati final nung Turkey tsür Girdi aser Bursa Fatma Un 148-152 agi mekoki liasü.

India tsürla ana yagi asaya kanga tashi ita tenzüka mezüngbuba set 38-37 agi akok, saka Turkey tsür ana yagi telangzüba tajung agüja tanabuba set nung score kasasa kümdaksü aser tasembuba set koka liasü. Tatembangbuba set nung Girdi aser Un nati point 39 angu aser India tsür ana yagi point 36 dang nguteta liasü.

West Ham aser head coach Graham Potter na pilaogo

Rongjui/September 27, 2025 (Agencies): Premier League club West Ham-i sangdong ka ajanga, head coach Graham Potter mapa nungi anentsüba metetdaksüogo. English top-flight nung season tasenba junga metenzüketba sülen pa mapa nungi anentsüogo.

Taoba season shimba sülen Potter ya iba London nung amendaker aliba club nungi ita ti inyakogo.

"Head Coach Graham Potter-i club toktsüba West Ham United-i jangjatsür," ta club sangdong ka ajanga metetdaksü.

"Taoba season tanabuba shilem aser 2025/26 season tetenzüklen result aser asayaba yimya dak ajemdaker Board of Directors-i, Premier League nung team jenjang tajungba kümdaksütsü atema teyari agütsütsü asoshi takaratiba nung temelenshi nüngdaker ta amanger," ta club sangdong ajangsa metetdaksü.

Club-isa, Bruno Saltor, Billy

Reid, Narcis Pelach, Casper Ankergrén, aser Linus Kandolin nung ajaki club toktsüba metetdaksüogo.

"Assistant Coach Bruno Saltor, First Team Coaches Billy Reid and Narcis Pelach, Lead Goalkeeper Coach Casper Ankergrén, aser Goalkeeper Coach Linus Kandolin nung ajaki club toktsüba jangjatsür," ta kasa sangdong ajanga metetdaksü.

"Board-i Graham aser pa indang coaching staff dang parnoki kanga meranga inyakba atema kanga pelaba lemsateper aser tarutsü takok nung aotsü imlaja atar," ta club sangdong ajangsa metetdaksü.

"Temelen shimtsü atema tang inyaktepdar. Iba dak sendakba nung club-i tangbo kecha shia matatetsü," ta club-isa metetdaksü.

Osang ajanga ashiba agi, Potter melena taoba Nottingham, Tottenham aser Wolves coach Nuno Espirito Santo shimtsü akok.

27 Buba MDFA Trophy-2025 October 14 nungi tenzüksü



Tanü MDFA pur den Press Conference agir kelen MDFA Trophy - 2025 Organising Committee Convenor Burakum (tiyong) aser MDFA tongti lenirtem k lemi tanogokba noksa.

Mokokchung, Rongjui/September 27(TYO) : 27th Mokokchung District Football Association(MDFA) Trophy-2025 tan October 14 nungi tenzüka Imkongmeren Sports Complex nung akatsü aser iba Trophy atema October 6 nü Fixture Draw asütsü ta MDFA ajanga tanü MDFA office nung osang zülurtem den jembidang Organising Committee Convenor Burakum ajanga metetdaksüogo.

Taküm iba Trophy nung Champion nem Rs.200000/- Runners Up nem Rs.100000/- aser Semi Finalist anaprongla nem Rs.25000/- agütsütsü aser iba den ano Best Defender, Best Goalkeeper, Best Midfielder, Highest Goal scorer aser Most Promising Player parnok kija shia nem Rs.5000/- agütsütsü ta Convenor-isa metetdaksüogo.

Trophy Convenor-isa Tang tashi MDFA Tropy-2025 asayatsü asoshi Team 10-i register süogo aser ano aika arutsü teimla lir. Iba Trophy tenzüka sentong nung tetushi tejaoker Wb.H.Sethrongkyu Sangtam MLA& Advisor Information Technology & Communication, Economics &

Statistics, Evaluation asütsü aser Tatembang sentong nung Wb.Lanuchuba Imchen DMC Councillor, President Longterok FC, President Youth Wing NDPP Dimapur Region asütsü aser Quarter Finals nungibo Match Patron alitsü ta metetdaksü.

Taküm iba MDFA Trophy asoshi temzüng aser teinyaksütem balala renema lir aser technical team- ibaji ajanga anishia MDFA Trophy asoshi inyakdang MDFA pur, Teams aser asayartem ajaki aser ibaji ajanga taküm 27th MDFA Trophy sünep sünepa agia tembangtsü teimla akar ta MDFA Vice President & Technical Committee Convenor Wb. Bendangnukshi ajanga metetdaksü.

Taküm iba Trophy nung asayatsü asoshi Team 10-i register süogo aser ano aika arutsü teimla lir talisa Mokokchung temeket yimtsüngtem nungi aika aruogo. Institution aika dang iba tournament nung shilem agitsü asoshi ajungshitepdagi aser tang tashi nung Nagaland University Lumami pur-bo register süogo ta Technical Committee Convenor-isa metetdaksü.

AIFF-i Super Cup 2025/26 group stage fixtures sangdongogo

Rongjui/Septemeber 27, 2025 (Agencies): All Indian Football Federation-i, 2025/26 season atema Super Cup indang fixture Hokolbarnü sangdongogo. Asayamung nung ajaki kanga yonga ata aliba asayaji Kolkata Derby asütsü.

Mohun Bagan SG, East Bengal FC, Chennaiyin FC aser Real Kashmir FC nung Group A nung lir aser FC Goa, Jamshedpur FC, NorthEast United FC, aser Inter Kashi nung Group B nung lir. Maneni B. Bengaluru FC, Mohammedan Sporting Club, Punjab FC, aser Gokulam Kerala FC nung Group C aser Mumbai City FC, Kerala Blasters FC, Hyderabad FC, aser Rajasthan United FC nung Group D nung ata lir.

Iba asayamung ya October 25 nü EBFC aser Real Kashmir na mezüng asaya-a tenzüksü aser iba sülen nikongtsütsü MBSG aser CFC na asayatsü.

Teloktem:

Group A: Mohun Bagan SG,

Chennaiyin FC, East Bengal FC, Real Kashmir FC

Group B: FC Goa, Jamshedpur FC, NorthEast United FC, Inter Kashi

Group C: Bengaluru FC, Mohammedan Sporting Club, Punjab FC, Gokulam Kerala FC

Group D: Mumbai City FC, Kerala Blasters FC, Hyderabad FC, Rajasthan United FC

Super Cup 2025/26 Fixtures.

October 25: East Bengal FC vs Real Kashmir FC

October 25: Mohun Bagan SG vs Chennaiyin FC

October 26: NorthEast United FC vs Inter Kashi

October 26: FC Goa vs Jamshedpur FC

October 27: Punjab FC vs Gokulam Kerala FC

October 27: Hyderabad FC vs Mumbai City FC

October 28: Chennaiyin FC vs East Bengal FC

October 28: Mohun Bagan SG vs Real Kashmir FC

October 29: Jamshedpur FC vs NorthEast United FC

October 29: FC Goa vs Inter

Kashi

October 30: Bengaluru FC vs Mohammedan Sporting Club

October 30: Rajasthan United FC vs Kerala Blasters FC

October 31: Real Kashmir FC vs Chennaiyin FC

October 31: Mohun Bagan SG vs East Bengal FC

November 1: Inter Kashi vs Jamshedpur FC

November 1: FC Goa vs NorthEast United FC

November 2: Mohammedan Sporting Club vs Punjab FC

November 2: Gokulam Kerala FC vs Bengaluru FC

November 3: Rajasthan United FC vs Mumbai City FC

November 3: Kerala Blasters FC vs Hyderabad FC

November 5: Bengaluru FC vs Punjab FC

November 5: Gokulam Kerala FC vs Mohammedan Sporting Club

November 6: Rajasthan United FC vs Hyderabad FC

November 6: Mumbai City FC vs Kerala Blasters FC.

Afghan tetsür refugee team UAE nung asayatsü lir

Rongjui/September 27, 2025 (Agencies): Afghan tetsür refugee football team-i international jenjang nung otsüsütsüsa jenjang ka agia taruba ita mezüngbuba United Arab Emirates nung asayamung ka nung shilem agitsü lir, ta FIFA-i metetdaksüogo.

Team koba FIFA Council-i agizükba sülen May ita tentetogo, iba ya Afghanistan telung nung aser alima ajunga nung asaya nung tetsürtem maongka kümzüka ayutsü

atema FIFA-i jenjang agia aruba nung shilem ka lir.

Parnok tang mezüngbuba Dubai nung October 23 nungi 29 tashi asayamung ka nung shilem agitsü, kong hosts UAE, Chad, aser Libya nung shilem agiba angutsü.

"Tetsürtem ajak football asayatetsüsa lenmang lapoktsütsüji FIFA atema tinyaksü tongtibangtiba aser iba asaya tarutsü yanglushiba nung tongtibang tinyaksüka lir," ta FIFA tir Gianni Infantino i ashi.

Taliban-i Afghanistan nung sorkar atsüngba sülen linük nung tetsürtem shisaluyimtsü aser mapa inyaksü atema tenokdangba balala agütsüogo aser iba den parnok park aser gym amalaila aotsü memelar.

Iba amala tia tensa ka nung Afghan tetsür refugee team ya Scottish coach Pauline Hamill kübok parnok indang maitsü tanaben yanglushia aruogo.

Alima ajunga nungi Afghan tsürtem tenüng nung asayatsü atema England aser Sydney tashi asayartem bushiaogo.

BILEMDANGANG

**"Temulungsentsü merek meraka alirtem
mapa temerek asür."**